

Bosna i Hercegovina
Federacija Bosne i Hercegovine
TUZLANSKI KANTON
Ministarstvo poljoprivrede,
šumarstva i vodoprivrede
T U Z L A

NACRT

Z A K O N
O Š U M A M A

Tuzla, januar 2017. godine

Na osnovu člana 24. stav 1. tačka c) Ustava Tuzlanskog kantona (“Službene novine Tuzlansko-podrinjskog kantona”, br. 7/97, 3/99 i “Službene novine Tuzlanskog kantona”, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj _____ 2017. godine, donosi

ZAKON O ŠUMAMA

I OPĆE ODREDBE

Član 1.

(Predmet Zakona)

Ovim Zakonom uređuje se očuvanje i zaštita šuma i šumskog zemljišta, jačanje njihovih funkcija, planiranje u šumarstvu i upravljanje šumama i šumskim zemljištem, ekonomske funkcije, socijalne funkcije, finansiranje biološke obnove šuma na teritoriji Tuzlanskog kantona (u daljem tekstu: Kanton), nadzor nad primjenom ovog Zakona, kaznene odredbe kao i druga pitanja od značaja za šume i šumsko zemljište.

Član 2.

(Definicija šuma i šumskih zemljišta)

(1) Pod šumom, u smislu ovog Zakona, podrazumijeva se zemljište obraslo šumskim vrstama drveća i grmlja čija površina prelazi 1.000 m² a širina najmanje 20 metara i njihove krošnje pokrivaju više od 30 % zemljišta. Šumom se smatraju i šumski rasadnici, plantaže šumskog drveća, čistine za trase dalekovoda i drugu javnu infrastrukturu u šumi, površinske vode i močvare unutar šuma i sastojine šumskog drveća i žbunja koje su izrasle na poljoprivrednom zemljištu ako su starije od 30 godina i ako njihove krošnje pokrivaju više od 30 % zemljišta.

(2) Šumsko zemljište, pored zemljišta obraslog šumom, obuhvata i neobrađeno, neiskorišteno ili neplodno zemljište izvan šume u onom omjeru u kojem obezbjeđuje ili potpomaže funkcije susjedne šume. Šumsko zemljište također sačinjavaju područja sa smanjenim šumskim pokrivačem, krš, čistine i livade unutar šuma.

(3) U slučaju sumnje ili spora da li se neko zemljište smatra šumom ili šumskim zemljištem, odluku donosi Ministar poljoprivrede, šumarstva i vodoprivrede Tuzlanskog kantona (u daljem tekstu: Ministar), uz pribavljeno mišljenje Kantonalne uprave za šumarstvo (u daljnjem tekstu: Kantonalna uprava).

Član 3.

(Definicija pojmova)

Pojmovi koji se koriste u ovom Zakonu imaju sljedeća značenja:

1. **Biološka obnova šuma** podrazumijeva pripremu zemljišta za prirodno podmlađivanje, pošumljavanje neobraslog šumskog zemljišta, popunjavanje, njegu i čišćenje šumskih kultura, prorjeđivanje sastojina, sanaciju požarišta, prevođenje degradiranih sastojina u viši uzgojni oblik, doznaku stabala za sječū, rekonstrukciju i konverziju izdanačkih šuma, makija, šikara i šibljaka, zaštitu šuma, projektovanje, izgradnju, rekonstrukciju i održavanje šumske infrastrukture.
2. **Čista sječū** znači sječū svog ili praktično svog drveća u sastojini, izlažući taj dio zemljišta ekološkim uslovima goleti čime stvara ozbiljne poteškoće za stanište ili susjedne sastojine. Čistom sječūm ne smatra se uklanjanje starih sastojina ukoliko je njihova reprodukcija obezbijedena na odgovarajući način.
3. **Direktna konverzija** je prevođenje šuma u viši uzgojni oblik.

4. **Doznaka stabala** podrazumijeva odabiranje, obilježavanje i evidentiranje stabala za sječu.
5. **Funkcije šuma** su:
 - a) **ekološke**: biodiverzitet – zaštita staništa, zaštita zemljišta, zaštita voda, klimatska – uključujući ulogu šuma kod vezivanja ugljika iz zraka;
 - b) **ekonomske**: prihod od proizvodnje drveta i sekundarnih šumskih proizvoda;
 - c) **socijalne**: rekreacija, turizam, obrazovanje, istraživanje, odbrana, zaštita objekata i infrastrukture.
6. **Gospodarenje šumama** obuhvata planiranje, uzgajanje, zaštitu i korištenje šuma i šumskog zemljišta u skladu sa odredbama šumsko-privredne osnove.
7. **Gospodarska jedinica** je područje šume u kome se obezbjeđuje trajnost gospodarenja.
8. **Izvođač radova u šumarstvu** je fizičko ili pravno lice koje je registrovano za izvođenje radova u šumarstvu.
9. **Korisnik državnih šuma** je šumsko-privredno društvo koje, na osnovu ugovora zaključenog u skladu sa odredbama ovog Zakona i drugih zakona, obavlja poslove gospodarenja državnim šumama.
10. **Korišćenje šume** obuhvata sječu i transport drveta, korišćenje sekundarnih šumskih proizvoda kao i prodaju šumskih drvnih sortimenata i sekundarnih šumskih proizvoda.
11. **Krčenje šume**, u smislu ovog Zakona, je sječa svih stabala i uklanjanje panjeva radi promjene namjene korištenja zemljišta. Izgradnja objekata u šumi i na šumskom zemljištu potrebnih za gospodarenje šumama kao i za prehranu i uzgoj divljači ne smatra se krčenjem.
12. **Otvorena vatra** je svaka vatra izvan zatvorenog objekta koji je pod krovom i zatvorenim ognjištem.
13. **Paljike** su opožarene površine nastale poslije požara.
14. **Pašarenje** je puštanje stoke na ispašu, žirenje i brst, kresanje grana i lisnika za prehranu stoke na dozvoljenim površinama.
15. **Površinske vode** su stalni i povremeni vodeni tokovi, te stajaće vode.
16. **Pravno lice registrovano za obavljanje poslova u šumarstvu** je privredno društvo registrovano kod nadležnog suda za poslove šumarstva koje u stalnom radnom odnosu ima uposlenog najmanje jednog diplomiranog inženjera šumarstva (VII stepen stručne spreme), odnosno osobu koja ima visoko obrazovanje po Bolonjskom sistem studiranja sa najmanje 240 ECTS bodova i najmanje dvije godine radnog iskustva u struci.
17. **Privremeni godišnji plan gospodarenja državnim i privatnim šumama** je plan gospodarenja državnim i privatnim šumama kojeg za državne šume izrađuje korisnik državnih šuma, a za privatne šume Kantonalna uprava ili pravno lice registrovano za obavljanje poslova šumarstvu, i to po isteku šumsko-privredne osnove. Istim se ne može gospodariti duže od godinu dana, a postupak donošenja je isti kao i za šumsko-privredne osnove.
18. **Pustošenje šuma** podrazumijeva podbjeljivanje stabala, oštećivanje stabala i njihovih dijelova, uništavanje i oštećivanje podmlatka, kao i svaka druga radnja kojom se slabi prinosna snaga šume i šumskog zemljišta, ugrožava opstanak šuma i njihove ekološke funkcije.
19. **Sanitarna sječa** znači sječu zaraženih, insektima napadnutih, veoma oštećenih ili izvaljenih stabala.
20. **Šumska infrastruktura** su šumski putevi, stalne vlake, stalne žičare i druge šumske komunikacije, objekti i kapaciteti u šumama koji su namijenjeni za gospodarenje šumama.
21. **Šumski proizvodi** su svi proizvodi šuma i šumskog zemljišta, uključujući, ali neograničavajući se na:
 - a) šumsko drveće i žbunje i svi njihovi dijelovi;

- b) sjeme, koštunjičavo voće, bobičasti plodovi, kora drveta, korijen, šišarke i plodovi druge vegetacije unutar šume;
- c) mahovina, paprat, trava, trska, cvijeće, ljekovito, aromatsko i jestivo bilje i druge biljke;
- d) gljive;
- e) biljni sok ili smola;
- f) med;
- g) listinac;
- h) divljač i ostale životinje koje žive u šumi;
- i) travnati ili pašnjački prekrivač;
- j) treset, zemlja, pijesak, šljunak, kamen (u daljem tekstu: mineralne sirovine).

Proizvodi iz alineja b) - j) ove tačke predstavljaju sekundarne šumske proizvode.

- 22. Šumsko-privredno područje** predstavlja u stanišnom, biološkom, geografskom, prometnom, ekološkom i ekonomskom pogledu jednu zaokruženu cjelinu u okviru koje se obezbjeđuje trajnost gospodarenja šumama i šumskim zemljištima.
- 23. Šumski putevi** su putevi izgrađeni na šumskom zemljištu, sa pratećom infrastrukturom, a koji su namjenjeni za prijevoz šumskih proizvoda te sav saobraćaj vezan za gospodarenje šumama i za spajanje sa sistemom javnih puteva. Vlake nisu šumski putevi, osim ako ne zadovoljavaju minimalne standarde određene za šumske puteve.
- 24. Šumski reprodukcioni materijal** je:
- a) sjeme: šišarke, plodovi i sjeme namijenjeno za proizvodnju biljaka;
 - b) dijelovi biljaka: grančice i snopovi rezanih grana namijenjeni za proizvodnju biljaka;
 - c) mlade biljke: biljke uzgojene iz sjemena ili dijelova biljke, uključujući i mlade biljke iz prirodnog podmlatka.
- 25. Šumsko uzgojne mjere** su sve mjere koje doprinose osnivanju novih sastojina u šumi i poboljšanju njihove stabilnosti, raznolikosti ili kvaliteta. Šumsko uzgojne mjere uključuju:
- a) mjere za obnovu šuma, odnosno za stvaranje novih sastojina;
 - b) njegu mladih razvojnih faza šuma, uključujući prorjeđivanje mladih sastojina;
 - c) specijalnu njegu mladih faza u prebornim šumama i drugim raznolikim šumama, izdanačkim šumama, kao i rubova šuma;
 - d) rekonstrukciju i konverziju izdanačkih šuma i šikara.
- 26. Trajnost gospodarenja šumama** podrazumjeva korištenje proizvoda šuma i upotrebu šuma i šumskih zemljišta na način i sa intenzitetom koji će očuvati njihov biodiverzitet, proizvodnost, sposobnost obnavljanja, vitalnost te povećati njihov potencijal da sada i u budućnosti obavljaju značajne ekološke, ekonomske i socijalne funkcije na lokalnom i globalnom nivou, a da se pri tom ne ugrozi funkcionisanje drugih ekosistema.
- 27. Upravljanje šumama i šumskim zemljištima** obuhvata podršku i kontrolu ekonomskih funkcija i korišćenje šuma i šumskog zemljišta.
- 28. Uredajni period** je planski period za koji se izrađuje i donosi šumsko-privredna osnova.
- 29. Vlasnici privatnih šuma** su pravna i fizička lica koja su na zakonit način stekla pravo vlasništva nad šumom ili šumskim zemljištem, što se dokazuje izvodom iz zemljišnih knjiga.
- 30. Zaštita šuma** je skup mjera i aktivnosti koje su dužni preduzimati vlasnici i korisnici koji gospodare šumama radi zaštite šuma od požara, drugih elementarnih nepogoda, štetnih organizama i štetnih antropogenih uticaja.

II PLANIRANJE U ŠUMARSTVU

Član 4. (Šumsko-privredna osnova)

(1) Šumama na određenom području se gospodari u skladu sa šumsko-privrednom osnovom, privremenim godišnjim planom gospodarenja, godišnjim planom gospodarenja i projektom za izvođenje radova u šumarstvu. Šumsko-privredna osnova za državne šume donosi se za šume u granicama jednog šumsko-privrednog područja, a za privatne šume donosi se jedinstvena osnova za sve šume na području jedne općine/grada. Šumsko-privredna osnova izrađuje se za period od deset godina i njene odredbe su obavezne.

(2) Izuzev od odredaba stava (1) ovog člana, ako ne postoje objektivne mogućnosti pravovremene izrade nove šumsko-privredne osnove, državnim i privatnim šumama može se gospodariti najduže godinu dana na osnovu privremenog godišnjeg plana gospodarenja za koji je postupak donošenja isti kao i za šumsko-privredne osnove. Odredbe privremenog godišnjeg plana gospodarenja su obavezne. Godina izvršenja privremenog godišnjeg plana gospodarenja smatra se godinom izvršenja nove šumsko-privredne osnove.

(3) Ukupan obim sječa predviđen šumsko-privrednom osnovom za uređajni period, po vrstama drveća i gazdinskim klasama, ne smije se prekoračiti. Od ukupno planirane količine sječe za planski period za visoke šume sa prirodnom obnovom, u okviru šumsko-privrednog područja godišnje se realizuje prosječna godišnja količina.

(4) Šumsko-privredna osnova, Zakon o proglašenju dijela područja planine Konjuh Zaštićenim pejzažom „Konjuh“, prostorni plan, prostorni plan područja posebnih obilježja Zaštićeni pejzaž „Konjuh“ 2010.-2030., plan upravljanja vodama, lovno privredna osnova, evidencije koje se vode u Zavodu za zaštitu kulturno historijskog i prirodnog naslijeđa i planovi korištenja mineralnih sirovina, moraju biti međusobno usklađeni.

(5) Vlada Tuzlanskog kantona (u daljem tekstu: Vlada Kantona) je vlasnik svih podataka i dokumenata u elektronskoj i drugoj formi izrađenih tokom izrade šumsko-privredne osnove za sve šume.

(6) Šumsko-privrednu osnovu može izrađivati pravno lice registrovano za obavljanje poslova u šumarstvu, za uzgoj i zaštitu šuma, uređivanje, iskorišćavanje šuma i ekonomiku u šumarstvu, koje u stalnom radnom odnosu ima najmanje četiri diplomirana inženjera šumarstva (VII stepen stručne spreme), odnosno visoko obrazovanje po Bolonjskom sistem studiranja sa najmanje 240 ECTS bodova, sa radnim iskustvom od najmanje pet godina na navedenim poslovima.

(7) Nadzor nad prikupljanjem podataka i izradom šumsko-privrednih osnova je obavezan i može ga vršiti pravno lice koje ispunjava uslove iz stava (6) ovog člana ili fizičko lice, diplomirani inženjer šumarstva (VII stepen stručne spreme), odnosno osoba koja ima visoko obrazovanje po Bolonjskom sistem studiranja sa najmanje 240 ECTS bodova, sa radnim iskustvom od najmanje pet godina na poslovima uređivanja šuma.

(8) Šumsko-privrednu osnovu za državne šume donosi Kantonalno šumsko-privredno društvo (u daljem tekstu: korisnik državnih šuma) uz prethodno pribavljenu saglasnost Ministarstva poljoprivrede šumarstva i vodoprivrede Tuzlanskog kantona (u daljem tekstu: Ministarstvo), koja se izdaje na osnovu prijedloga stručne komisije i mišljenja Ministarstva prostornog uređenja i zaštite okolice Tuzlanskog kantona, općine/grada i JU Zaštićeni pejzaž „Konjuh“. Šumsko-privredna osnova za državne šume ne može se primjenjivati, prije nego što na nju Ministarstvo da saglasnost.

(9) Šumsko-privrednu osnovu za privatne šume, na osnovu prijedloga stručne komisije, donosi Ministarstvo.

(10) Poslove izrade šumsko-privredne osnove za državne šume finansira korisnik državnih šuma i odgovoran je za njenu pravovremenu izradu. Korisnik državnih šuma je dužan najmanje 120 dana prije isteka roka važnosti šumsko-privredne osnove, dostaviti dva primjerka novoizrađene osnove Ministarstvu.

(11) Nadzor nad prikupljanjem podataka i izradom šumsko-privrednih osnova vrši Ministarstvo putem Kantonalne uprave.

(12) Sastav, rad i troškove stručne komisije iz stavova (8) i (9) ovog člana, određuje Ministar.

(13) Ako postoje objektivni razlozi za odstupanje od šumsko-privredne osnove, naročito zbog prirodnih nepogoda ili bitno promijenjenih privrednih uslova, obavezno je izvršiti njenu reviziju. Reviziju odobrava i na izvršenu reviziju daje saglasnost Ministarstvo i jedan primjerak se dostavlja kantonalnom šumarskom inspektor (u daljem tekstu: šumarski inspektor).

(14) Ministar donosi pravilnik o sadržaju i postupku izrade šumsko-privrednih osnova za državne šume i privatne šume, kao i reviziji istih.

Član 5.

(Godišnji plan gospodarenja za realizaciju šumsko-privredne osnove)

(1) Šumsko-privredna osnova se realizuje godišnjim planovima koji sadrže prosječno jednu desetinu svih planiranih radova po šumsko-privrednoj osnovi.

(2) Godišnji plan gospodarenja državnim šumama donosi korisnik državnih šuma nakon obavljenih konsultacija sa općinom/gradom na čijem području će se izvoditi radovi, predviđeni godišnjim planom gospodarenja.

(3) Saglasnost na godišnji plan gospodarenja državnim šumama, koji je korisnik državnih šuma dužan dostaviti najkasnije do 30.11. tekuće za narednu godinu, daje Kantonalna uprava u roku od 30 dana od dana prijema godišnjeg plana gospodarenja, a radovi predviđeni godišnjim planom gospodarenja ne mogu se započeti bez saglasnosti Kantonalne uprave.

(4) Usvojeni godišnji plan gospodarenja korisnik državnih šuma je dužan u roku od 15 dana od dana usvajanja dostaviti Kantonalnoj upravi za inspeksijske poslove - šumarskoj inspekciji, Kantonalnoj upravi za šumarstvo i općini/gradu na čijem području će se izvoditi radovi predviđeni godišnjim planom gospodarenja.

Član 6.

(Projekat za izvođenje radova u šumarstvu)

(1) Projekat za izvođenje radova u šumarstvu se izrađuje za odjel za državne šume i katastarsku parcelu/parcele za privatne šume. Radovi predviđeni projektom za izvođenje su obavezni.

(2) Projekat za izvođenje radova u šumarstvu važi dvije godine i mora sadržavati: radove uzgoja, zaštite i korišćenja šuma po obimu, mjestu i vremenu izvođenja, preglednu kartu, procjenu uticaja radova na okoliš i ekonomsku analizu.

(3) Projekat za izvođenje radova u šumarstvu mogu izrađivati diplomirani inženjeri šumarstva (VII stepen stručne spreme), odnosno osobe koje imaju visoko obrazovanje po Bolonjskom sistem studiranja sa najmanje 240 ECTS bodova i najmanje dvije godine radnog iskustva u struci. Korisnik državnih šuma, odnosno vlasnik privatne šume, određuje lice za izradu projekta za izvođenje radova u šumarstvu.

(4) Projekat za izvođenje radova u šumarstvu donosi korisnik državnih šuma za državne šume, a za privatne šume Kantonalna uprava ili pravno lice registrovano za obavljanje poslova u šumarstvu.

(5) Izuzetno od stava (1) ovog člana, projekat za izvođenje radova u šumarstvu može se izrađivati za više odjela u jednom slivu ako sječa i izrada sanitarnih užitaka ne prelazi više od 100 m³ po jednom odjelu.

(6) Za privatne šume izrađuju se projekti za šumsko-uzgojne radove kao i za sječu ako je godišnji obim sječa veći od 100 m³ po katastarskoj čestici.

(7) Korisnik državnih šuma i Kantonalna uprava ili pravno lice registrovano za obavljanje poslova u šumarstvu za privatne šume dužni su da vode registar izrađenih i donesenih projekata za izvođenje radova u šumarstvu i da sve izvršene radove po projektu evidentiraju u odgovarajuće evidencije koje će propisati Ministar.

III PRIVREĐIVANJE U ŠUMARSTVU

Član 7. ***(Sječa šuma)***

(1) Stabla u šumi mogu se sjeći tek poslije njihovog odabiranja i obilježavanja u skladu sa smjericama šumsko-privredne osnove.

(2) Prije sječe u državnim šumama, redovne ili sanitarne, korisnik državnih šuma prijaviti će sječu nadležnom šumarskom inspektor. Prijava će biti poslana najmanje 14 dana i najviše 60 dana prije početka sječe doznačenih stabala i sadržavat će:

- a) broj odjela iz šumsko-privredne osnove, odluku o donošenju projekta i razlog za sječu u slučaju sanitarne ili druge slučajne sječe;
- b) planirani rok za sječu;
- c) vrstu sječe, količinu i strukturu drvne mase za sječu po vrstama drveća;
- d) način obnove šume;
- e) šumsko-uzgojne i zaštitne mjere koje će se sprovesti nakon sječe;
- f) način izvlačenja šumskih drvnih sortimenta sa skicom postojećih i novih vlaka;
- g) identifikaciju lica koja je izvršila doznaku i izradila projekat za izvođenje.

(3) Šteta koja se nanese zemljištu mora biti popravljena odmah nakon završetka izvlačenja. Ministar će propisati način, oblik i sadržaj obrasca o prijavi sječe.

(4) Ukoliko postoji opravdan razlog za sumnju da je planirana ili započeta sječa, ili druge radnje u suprotnosti sa šumsko-privrednom osnovom, ovim Zakonom ili propisima koji su doneseni na osnovu ovog Zakona, nadležni šumarski inspektor može zabraniti planiranu sječu dok se ne otklone utvrđene nepravilnosti. U ovakvom slučaju nadležni šumarski inspektor može tražiti mišljenje Kantonalne uprave.

(5) Korisnik državnih šuma dužan je prije sječe, o sjeći obavijestiti Kantonalnu upravu i općinu/grad na čijem se području vrši sječa.

(6) Pravna i fizička lica koja nanesu štetu šumama i šumskom zemljištu po bilo kojem osnovu, dužni su korisniku državne šume, odnosno vlasniku privatne šume nadoknaditi štetu prema odštetnom cjenovniku koji će propisati Ministar.

Član 8. ***(Doznaka stabala za sječu)***

(1) Doznaka stabala za sječu vrši se obilježavanjem stabala ili obilježavanjem površina obraslih drvećem. Obilježavanje površina za sječu može se vršiti samo u izdanačkim šumama u svrhu indirektno i direktne konverzije šuma.

(2) Doznaku stabala za sječu može vršiti diplomirani inženjer šumarstva (VII stepen stručne spreme), odnosno osoba koja ima visoko obrazovanje po Bolonjskom sistemu studiranja sa najmanje 240 ECTS bodova i najmanje dvije godine radnog iskustva u struci kojeg odredi korisnik državnih šuma za državne šume, a za privatne šume Kantonalna uprava, odnosno pravno lice registrovano za obavljanje poslova u šumarstvu.

(3) Izuzetno od stava (2) ovog člana, doznaku stabala u šumama koje su predviđene za direktnu konverziju i sanitarnu sječu, a u privatnim šumama i za snabdijevanje ogrevnim drvetom može vršiti osoba koja ima visoko obrazovanje po Bolonjskom sistem studiranja sa najmanje 180 ECTS bodova ili šumarski tehničar sa deset godina radnog iskustva u struci, uz

kontrolu diplomiranog inženjera šumarstva (VII stepen stručne spreme), odnosno osobe koja ima visoko obrazovanje po Bolonjskom sistem studiranja sa najmanje 240 ECTS bodova.

(4) Doznaka i sječa stabala ne može se vršiti u šumama za koje imovinsko-pravni odnosi nisu riješeni, granice utvrđene i na terenu vidno i na propisani način obilježene.

(5) Doznaka stabala za sječu i obim šumsko-uzgojnih radova u privatnim šumama vrši se u skladu sa šumsko-privrednom osnovom, na osnovu rješenja Kantonalne uprave.

(6) Doznaka i sječa stabala, odnosno površina za sječu u privatnim šumama, može se odobriti samo licu koje dostavi dokaz o pravu vlasništva i posjeda na nekretnini.

(7) Protiv rješenja iz stava (5) ovog člana može se izjaviti žalba Ministarstvu u roku od osam dana od dana prijema istog.

(8) Stabla u šumi mogu se sjeći tek poslije izvršene doznake, izrade projekta za izvođenje radova u šumarstvu i obavještanja Kantonalne uprave i općine/grada na čijem se području vrši sječa.

Član 9.

(Biološka obnova šuma)

Korisnik državnih šuma i vlasnik/predstavnik vlasnika privatne šume dužni su izvršavati poslove biološke obnove šuma minimalno u obimu koji je predviđen šumsko-privrednom osnovom.

Član 10.

(Tehnički prijem radova)

(1) Tehnički prijem radova izvedenih po projektu za izvođenje radova u šumarstvu vrši Komisija za tehnički prijem radova, koju za državne šume formira korisnik državnih šuma, a za privatne šume Kantonalna uprava ili pravno lice registrovano za obavljanje poslova u šumarstvu.

(2) Komisija iz stava (1) ovog člana sastoji se od tri člana. U sastav Komisije obavezno ulazi diplomirani inženjer šumarstva (VII stepen stručne spreme) ili osoba koja ima visoko obrazovanje po Bolonjskom sistem studiranja sa najmanje 240 ECTS bodova, a koji je izradio projekat za izvođenje radova u šumarstvu i dva diplomirana inženjera šumarstva (VII stepen stručne spreme), odnosno osobe koje imaju visoko obrazovanje po Bolonjskom sistem studiranja sa najmanje 240 ECTS bodova. Tehnički prijem radova pošumljavanja vrši se poslije dvije godine od završetka njihovog izvođenja.

(3) Primjerak zapisnika Komisije dostavlja se u roku od osam dana od dana završetka pregleda Kantonalnoj upravi za inspeksijske poslove - šumarskom inspektoratu.

Član 11.

(Izvođenje radova u šumarstvu)

(1) Radove u šumi mogu izvoditi samo lica koja su kvalifikovana ili obučena za izvođenje odgovarajućih poslova. Lica registrovana za obavljanje poslova u šumarstvu obavezna su obezbijediti tehničku i specijaliziranu obuku zaposlenih.

(2) Kantonalna uprava, u saradnji sa obrazovnim ustanovama, organizuje obuke iz stava (1) ovog člana za zaposlenike lica registrovanih za obavljanje poslova u šumarstvu, koji nemaju uvjerenje o završenoj šumarskoj obuci, kao i za vlasnike privatnih šuma, o čemu je dužna pribaviti uvjerenje ustanove koja je izvršila obuku.

Član 12.

(Zabrana čistih sječa i drugih oblika pustošenja šuma)

(1) Nisu dozvoljene čiste sječe i drugi oblici pustošenja šuma izuzev pripreme šumsko uzgojnih mjera s ciljem unaprijeđenja šumskih sastojina u obimu koji je planiran šumsko-privrednom osnovom, iz sanitarnih razloga ili provođenja preventivnih zaštitnih mjera.

(2) Sve površine nastale čistom sječom i paljike moraju biti pošumljene u roku od dvije godine nakon sječe ili šumskog požara, prirodnom obnovom ili putem pošumljavanja.

IV ZAŠTITA OD BIOTIČKIH I NEBIOTIČKIH AGENSA

Član 13.

(Preventivne mjere zaštite šuma)

(1) Preventivne mjere zaštite od biotičkih i nebiotičkih agensa, koji bi mogli ugroziti stabilnost šuma i njihove funkcije, zasnivaju se na gospodarenju šumama, koje uvažava prirodne procese, kao i na održavanju i odgovarajućem unaprjeđenju biodiverziteta u šumi.

(2) Korisnik državnih šuma i vlasnici privatnih šuma dužni su da provode ili obezbjeđuju provođenje šumskog reda, sanitarne sječe i druge preventivne mjere prije nego što bi se šume mogle ugroziti prekomjernim razmnožavanjem insekata, širenjem uzročnika biljnih bolesti ili drugih štetnih organizama.

(3) Kantonalna uprava prikuplja podatke u vezi sa zaštitom šuma, koje korisnik državnih šuma i vlasnici privatnih šuma dostavljaju u roku koji odredi Kantonalna uprava, obezbjeđuje informacije o pojavi biljnih bolesti i štetočina, savjetuje o pitanjima koja se tiču integralne zaštite šuma.

(4) Ministar naređuje dodatne mjere za zaštitu šume ukoliko Kantonalna uprava ustanovi da je biološka ravnoteža poremećena ili ukoliko postoji opasnost od drugog velikog oštećenja šume.

(5) Ministar donosi Pravilnik o obimu mjera o uspostavljanju i održavanju šumskog reda i način njihovog provođenja.

Član 14.

(Obnova šuma nakon nepogode)

(1) U slučaju nepogode u šumi uzrokovane bilo kojim biotičkim ili nebiotičkim agensom, korisnik državnih šuma za državne šume, a Kantonalna uprava za privatne šume, dužni su da pripreme plan za obnovu oštećenih i uništenih šuma i šumskog zemljišta, koji sadrži opis nepogode, stepen oštećenja šume, mjere koje se trebaju provesti i troškove sanacije i obnove.

(2) Ako troškovi iz stava (1) ovog člana prelaze finansijske mogućnosti korisnika državnih šuma, odnosno vlasnika privatnih šuma, Vlada Kantona će obezbijediti nedostajuća sredstva u cilju primjene plana.

V PROMET DRVETA I NEDRVNIH ŠUMSKIH PROIZVODA

Član 15.

(Promet drveta i nedrvnih šumskih proizvoda)

(1) Zabranjeno je drvo, dijelove stabala i grane posječene u šumi i izvan šume (na poljoprivrednom zemljištu, međama, pojedinačna stabla i sl.), pomjerati od panja dok se ne

obilježi šumskim čekićem (žigoše), obrojči, premjeri i stavljati u promet dok se ne izda otpremni iskaz.

(2) Žigosanje, obrojčavanje, premjeravanje i izdavanje otpremnog iskaza za drvo koje potiče iz državne šume vrši korisnik državnih šuma, a za drvo iz privatnih šuma i sa drugih površina Kantonalna uprava ili pravno lice registrovano za obavljanje poslova u šumarstvu.

(3) Zabranjeno je nedrvne šumske proizvode stavljati u promet bez odobrenja korisnika državnih šuma ili vlasnika šume.

(4) Pod prometom drveta i nedravnih šumskih proizvoda, u smislu ovog Zakona, podrazumjeva se prevoz saobraćajnicama, kupovina, prodaja, poklon, skladištenje, kao i primanje drveta u pilane u kojima se vrši rezanje drveta.

(5) Ne može se dozvoliti ili izvršiti sječa šume na uzurpiranom državnom šumskom zemljištu na kome imovinsko-pravni odnosi nisu raspravljeni ili dozvoliti ili izvršiti sječa drveta bez prethodne doznake ili prisvojiti tako posječena drvena masa, niti se može drvo staviti u promet prije žigosanja, obrojčavanja i snabdijevanja drveta sa otpremnim iskazom ili staviti u promet nedrvne šumske proizvode u suprotnosti sa odredbama ovog člana.

(6) Privremeno oduzimanje drveta i nedravnih šumskih proizvoda koji su stavljani u promet u suprotnosti sa odredbama ovog člana vrše čuvari šuma, pripadnici policije i kantonalni šumarski inspektori, a privremeno oduzimanje sredstava kojima je izvršena nezakonita radnja pripadnici policije, u skladu sa važećim propisima koji se odnose na krivičnu, odnosno prekršajnu odgovornost. Privremeno oduzete šumske proizvode, na mjestu privremenog oduzimanja, preuzima korisnik državnih šuma, Kantonalna uprava i ovlašteno pravno lice za obavljanje poslova u šumarstvu, koji organizuju utovar, prijevoz i skladištenje na mjestu koje sami odrede. U slučaju da postoji mogućnost da se u toku pohranjivanja šumskim proizvodima ili sredstvima umanjuje vrijednost ili da njihovo pohranjivanje iziskuje nesrazmjerne troškove, privremeno oduzeta roba će se prodati licitacijom, a finansijska sredstva deponovati na prijelazni račun Budžeta Tuzlanskog kantona (u daljem tekstu: Budžet kantona).

(7) Lica iz stava (6) ovog člana imaju pravo legitimisati sva lica koja se kreću na području šume koju čuvaju, odnosno nad kojom vrše nadzor, kao i lica koja prometuju šumskim proizvodima.

(8) U periodu vegetacije, od 1. aprila do 1. novembra, drvo četinara i brijesta ne može se sa korom stavljati u promet i uskladištavati, izuzev ako period od sječe do otpreme traje kraće od ciklusa razvoja insekta, a najduže do 21 dan.

(9) Način žigosanja, obrojčavanja, premjeravanja, sadržaj i način izdavanja otpremnog iskaza za drvo propisat će Ministar.

VI ŠUME I ŠUMSKO ZEMLJIŠTE S POSEBNIM REŽIMOM GOSPODARENJA

Član 16.

(Proglasenje zaštitnih šuma, šuma s posebnom namjenom i šuma od vitalnog interesa)

(1) Da bi se obezbijedila zaštita ili specijalni režim gospodarenja, određene šume mogu biti proglašene zaštitnim šumama ili šumama s posebnom namjenom. Procjena šumskih funkcija u ovim šumama utvrđuje se stručnim šumarskim elaboratom sa podacima o stanju šuma i principima i metodama gospodarenja šumama u cilju očuvanja šuma i ostvarivanja namjene proglašenja područja, izvršioca propisanog režima kao i pravnog lica koje je odgovorno za obezbjeđenje sredstava za pokriće troškova u vezi sa posebnim režimom gospodarenja.

(2) Stručni šumarski elaborat iz stava (1) može izraditi pravno lice iz člana 4. stav (6) ovog Zakona.

(3) Korisnik državnih šuma, odnosno vlasnici privatnih šuma, imaju pravo na naknadu za ograničeno korišćenje ili povećane troškove zaštite. Naknadu snosi pravno lice na čiji je zahtjev proglašenje izvršeno. Visina naknade se utvrđuje sporazumno, a ako se sporazum ne postigne naknada se utvrđuje kod nadležnog suda.

(4) Ministarstvo, na osnovu podataka koje mu dostavlja Kantonalna uprava, vodi evidenciju zaštitnih šuma i šuma sa posebnom namjenom.

Član 17.

(Zaštitne šume i šume od vitalnog interesa)

(1) Zaštitne šume služe za zaštitu zemljišta na strmim terenima i zemljišta podložnih erozijama, bujicama, klizištima, zaštitu naselja, privrednih i drugih objekata, izvorišta, vodotoka i akumulacija i šume koje su podignute kao zaštitni pojasevi.

(2) Vlada Kantona proglašava šume i šumsko zemljište zaštitnim šumama na prijedlog Ministarstva, sačinjen uz prethodno pribavljeno mišljenje Kantonalne uprave i općine/grada na čijem se području nalaze šume i šumsko zemljište koje treba proglasiti zaštitnim šumama.

(3) Vlada Kantona proglašava šume i šumsko zemljište šumama od vitalnog interesa za trajno gospodarenje šumama na prijedlog Ministarstva, sačinjen uz prethodno pribavljeno mišljenje Kantonalne uprave i općine/grada na čijem se području nalaze šume i šumsko zemljište koje treba proglasiti šumama od vitalnog interesa za trajno gospodarenje šumama.

(4) Primjerak akta o proglašenju zaštitnih šuma, kao i akta o proglašenju šuma od vitalnog interesa za trajno gospodarenje šumama dostavlja se Ministarstvu, nadležnoj instituciji za zaštitu kulturno-historijskog i prirodnog naslijeđa, Kantonalnoj upravi i općini/gradu na čijem se području nalaze šume i šumsko zemljište koje je proglašeno zaštitnim šumama, odnosno šumama od vitalnog interesa za trajno gospodarenje šumama.

Član 18.

(Šume s posebnom namjenom)

(1) Šume ili njeni dijelovi koje imaju poseban kulturni, historijski, ekološki i prirodni značaj, uključujući i šume namijenjene za izletišta, odmor, opće obrazovanje, rekreaciju, turizam, klimatska i druga lječilišta, proglašavaju se šumama sa posebnom namjenom u skladu sa odredbama Zakona o zaštiti prirode („Službene novine Federacije Bosne i Hercegovine“, broj: 66/13) i Zakona o zaštiti prirode („Službene novine Tuzlanskog kantona“, broj: 10/04) ili drugim propisom koji također propisuje poseban režim gospodarenja za šume.

(2) Šume s posebnom namjenom su i šume od posebnog značaja za odbranu i potrebe Oružanih snaga Bosne i Hercegovine, kao i šume ili njeni dijelovi registrovani kao sjemenske sastojine i sjemenski objekti, u skladu sa odredbama Zakona o sjemenu i sadnom materijalu šumskih i hortikulturnih vrsta drveća i grmlja („Službene novine Federacije Bosne i Hercegovine“, broj: 71/05 i 08/10).

(3) Zahtjev sa elaboratom za proglašenje šuma sa posebnom namjenom koji podnosi zainteresovano pravno lice obavezno sadrži: cilj i razloge za proglašenje; popis katastarskih parcela kao i naziv šumsko-privredne jedinice; broj odjela i oznaku odsjeka; kartu najmanje razmjere 1:10.000 sa ucrtanim parcelama; stručni šumarski elaborat iz člana 16. ovog Zakona; procjenu okolišnog uticaja; predložena ograničenja u gospodarenju; predložene naknade sa izvorom finansiranja; saglasnost općine/grada i odgovarajuće administrativne mjere uključujući javne obavijesti i rasprave.

(4) Primjerak akta o proglašenju šuma s posebnom namjenom dostavlja se Ministarstvu, Ministarstvu prostornog uređenja i zaštite okolice, nadležnoj instituciji za zaštitu kulturno-historijskog i prirodnog naslijeđa, Kantonalnoj upravi i općini/gradu na čijem se području nalazi šuma i šumsko zemljište koje je proglašeno šumom s posebnom namjenom.

Član 19.
(Šume na kršu)

Šume na kršu bitno smanjene produktivnosti i šumska zemljišta na kršu, zbog svojih specifičnosti (posebnosti) klasifikuju se kao područja sa posebnim režimom gospodarenja, te uživaju podršku Kantona i općina/grada i klasifikuju se kao područja velike opasnosti od šumskih požara.

VII ZAŠTITA ŠUMA I ŠUMSKOG ZEMLJIŠTA OD ŠTETA

Član 20.
(Zabrana loženja vatre u šumi i zaštita šuma od požara)

(1) U šumama i na šumskom zemljištu kao i na drugom zemljištu na udaljenosti manjoj od 150 m od šume, nije dozvoljeno loženje otvorene vatre.

(2) Zabranjena je izgradnja i rad fabrika i drugih objekata koji rade sa otvorenim plamenom na udaljenosti manjoj od 300 metara od granice šume.

(3) Korisnik državnih šuma u saradnji sa Ministarstvom, Kantonalnom upravom i organom nadležnim za poslove civilne zaštite Kantona, izrađuje i provodi planove za zaštitu šuma od požara i redovno izvještava Vladu Kantona.

Član 21.
(Upotreba hemijskih sredstava u šumi)

(1) Nije dozvoljena upotreba hemijskih sredstava, odlaganje otpada, smeća ili zagađujućih tvari u šumi i na šumskom zemljištu.

(2) Izuzetno od stava (1) ovog člana, uz dozvolu Ministarstva, certificovana hemijska sredstva, pod uslovom da ne ugrožavaju biološku ravnotežu, mogu biti korišćena u šumskim rasadnicima i u šumama za zaštitu biljaka od divljači i od korova u cilju smanjenja prekomjerne populacije insekata čiji broj ne može biti smanjen ni na koji drugi način, te za gašenje šumskih požara.

Član 22.
(Pašarenje)

Paša, žirenje, brst, kresanje grana i lisnika (u daljnjem tekstu: pašarenje) u šumama nije dozvoljeno bez pisanog odobrenja korisnika državnih šuma ili vlasnika privatnih šuma, na površinama koje su određene šumsko-privrednom osnovom.

Član 23.
(Praćenje zdravstvenog stanja šuma)

Kantonalna uprava i korisnik državnih šuma dužni su da prate zdravstveno stanje šuma i obim šteta u šumama, poduzimaju adekvatne preventivne mjere za sprečavanje pojava koje mogu prouzrokovati štete na šumi, te o tome izvještavaju Ministarstvo.

VIII NEDRVNI ŠUMSKI PROIZVODI I ZAŠTITA UGROŽENIH VRSTA

Član 24.

(Iskorišćavanje nedravnih šumskih proizvoda)

(1) Korisnik državnih šuma i vlasnici privatnih šuma mogu uzgajati i iskorišćavati nedrvne šumske proizvode ili odobriti drugim pravnim i fizičkim licima njihovo iskorišćavanje u obimu i na mjestima koja su određena u šumsko-privrednoj osnovi.

(2) Korisnik državnih šuma može za vlastite potrebe koristiti mineralne sirovine na površinskim kopovima-pozajmištima predviđenim šumsko-privrednom osnovom u svrhu izgradnje i održavanja šumske transportne infrastrukture.

(3) Ako korisnik državnih šuma planira koristiti mineralne sirovine u komercijalne svrhe dužan je postupiti u skladu sa odredbama Zakona o rudarstvu Federacije Bosne i Hercegovine („Službene novine Federacije Bosne i Hercegovine“, broj: 26/10).

Član 25.

(Zaštita ugroženih vrsta)

Nije dozvoljena sječa, iskorjenjivanje ili bilo kakvo oštećivanje stabala pančičeve omorike (*Picea omorika* (Pančić) Purk), tise (*Taxus baccata* L.), mečje lijeske (*Corylus colurna* L.), planinskog javora (*Acer heldreichii* Orph.), planinskog bora (*Pinus mugo* Tuna), zelene johe (*Alnus viridis* (Chaix) Lam. & DC.), munike (*Pinus heldreichii* Christ.) i zanovijeti (*Fetteria ramentacea* (Sieber) Presi), osim ako je potrebno provesti uzgojne i sanitarne sječe.

IX SAOBRAĆAJ U ŠUMAMA

Član 26.

(Gradnja šumske infrastrukture)

(1) Šumska infrastruktura služi prvenstveno za potrebe gospodarenja šumama i sastavni je dio šume.

(2) Planiranje, izgradnja i održavanje šumske infrastrukture obavlja se uz poštivanje tehničkih, gospodarskih i ekoloških uslova, šumskog tla, vegetacije, divljači i uz njihovu maksimalnu zaštitu.

(3) Pri planiranju i izgradnji šumske infrastrukture potrebno se prilagoditi prirodnom okolišu te uvažavati potrebe lokalne zajednice, kao i protupožarne, turističke i rekreativne potrebe.

(4) Šumska infrastruktura mora biti izgrađena, održavana i korišćena na način da isključuje:

- a) ugrožavanje izvora vode;
- b) pojavu erozivnih procesa;
- c) sprječavanje toka površinskih i podzemnih voda;
- d) narušavanje ravnoteže nestabilnog tla i povećanje rizika od klizišta;
- e) uticaj na područja koja su važna za opstanak divljih životinja i biološku raznolikost;
- f) uticaj na prirodno i kulturno naslijeđe;
- g) ugrožavanje ostalih funkcija ili višenamjensku upotrebu šume.

(5) Šumski kamionski put se može graditi nakon što se izradi glavni projekat za njegovu izgradnju i pribavi odobrenje za građenje od nadležnog organa. Za šumske tehnološke puteve (traktorske i konjske vlake) nije potrebno pribaviti odobrenje za građenje.

(6) Korisnik državnih šuma, u skladu sa odredbama ovog Zakona i šumsko-privredne osnove, gradi, održava i nadgleda šumsku transportnu infrastrukturu i promet na istoj.

Član 27.

(Kretanje motornih vozila u šumi)

(1) Nije dozvoljeno kretanje motornih vozila u šumama i na šumskim putevima osim u svrhu gospodarenja šumama i nadzora, spašavanja, policijskih istraga, vojnih manevara, mjera za zaštitu od prirodnih katastrofa, te pristupa vlasnika, korisnika i pojedinaca zemljištu za koje su odgovorni, kao i lokalnog stanovništva.

(2) Korisnik državnih šuma i vlasnici privatnih šuma mogu dozvoliti kretanje šumskim putem trećem licu. Za organizovanje biciklističkih i moto trka šumskim putem potrebno je pribaviti dozvolu korisnika državnih šuma/vlasnika privatnih šuma koja može uključivati određenu naknadu.

(3) Eventualna šteta na šumskim putevima učinjena od strane drugih korisnika mora biti nadoknađena korisniku državnih šuma/vlasniku privatnih šuma.

Član 28.

(Pristup šumama)

(1) Sva lica imaju pravo kretanja kroz šumu ili šumskim zemljištem na vlastitu odgovornost, ako nije drugačije određeno ovim Zakonom ili šumsko-privrednom osnovom. Korisnik državne šume, odnosno vlasnici privatnih šuma nisu obavezni poduzimati posebne mjere opreza, niti će se smatrati odgovornim za bilo kakve štete ili ozljede koje pretrpe takva lica.

(2) Bez odobrenja korisnika državnih šuma ili vlasnika privatnih šuma zabranjeno je:

- a) razapinjati šator ili postavljati logor u šumi;
- b) smještati pčelinjake;
- c) sakupljati nedrvne šumske proizvode u količini koja prelazi 2 kg;
- d) ulaziti u fizički i znakovima označena šumska područja i zatvorene šumske ceste;
- e) ulaziti u područja, šumske ceste ili izletišta gdje se vrši sječa;
- f) ulaziti u područja prirodne obnove, pošumljena područja i šumske rasadnike i ulaziti u predjele i infrastrukturu koja je namijenjena za lov.

X UPRAVLJANJE ŠUMAMA

Član 29.

(Upravljanje šumama)

(1) Šume i šumsko zemljište su u državnom vlasništvu (u daljnjem tekstu: državne šume) i u privatnom vlasništvu (u daljnjem tekstu: privatne šume).

(2) Državnim šumama upravlja Vlada Kantona putem Ministarstva, pod uslovima utvrđenim ovim Zakonom.

(3) Pravo vlasništva nad državnim šumama ne može se steći njihovim korišćenjem ili zauzimanjem bez obzira na period trajanja istog, odnosno dosjelošću.

Član 30.

(Zabrana zauzimanja šuma)

(1) Vlada Kantona, Ministarstvo i Kantonalna uprava provode prava i obaveze iz oblasti šumarstva na području Kantona u skladu sa odredbama ovog Zakona i propisa donesenih na osnovu ovog Zakona.

(2) Zabranjeno je svako neovlašteno upuštanje, kao i zauzimanje državne šume. Neovlašteno zauzetu državnu šumu bespravni korisnik dužan je napustiti odmah po prijemu rješenja šumarskog inspektora ili naloga čuvara šuma.

Član 31. ***(Promet šuma)***

- (1) Zabranjen je promet državnih šuma izuzev u svrhu arondacije i komasacije.
- (2) Državne šume ne mogu biti predmetom privatizacije.
- (3) Granice državnih šuma moraju na terenu biti obilježene vidnim i trajnim znakovima.
- (4) Poslove obilježavanja, održavanja i obnove granica državnih šuma i graničnih znakova vrši korisnik državnih šuma.

Član 32. ***(Privatne šume)***

- (1) Privatne šume, u smislu ovog Zakona, su sve šume i šumsko zemljište za koje fizičko ili pravno lice izvodom iz zemljišnih knjiga dokaže vlasništvo.
- (2) Vlasnik privatne šume upravlja svojom šumom i ugovorom uz naknadu, prenosi obavljanje stručnih poslova u skladu sa ovim Zakonom Kantonalnoj upravi.
- (3) Kantonalna uprava obavlja upravne i stručne poslove u pogledu gospodarenja privatnim šumama, a može stručne poslove prenijeti na pravno lice registrovano za obavljanje poslova u šumarstvu. Prenošnje poslova vrši se uz obostranu saglasnost i reguliše se međusobnim ugovorom.
- (4) Pod stručnim poslovima iz stava (2) ovog člana podrazumijevaju se doznaka, izrada izvedbenog projekta, primanje i premjeravanje drvene mase, izdavanje otpremnog iskaza, planiranje šumsko-uzgojnih radova i zaštita šuma i vođenje evidencija o izvršenim poslovima.
- (5) Naknada iz stava (2) ovog člana iznosi najviše 10 % od cijene na panju šumskih drvnih sortimenata po cjenovniku korisnika državnih šuma.
- (6) Čuvanje privatnih šuma u nadležnosti je njihovih vlasnika.

XI EKONOMSKE FUNKCIJE ŠUME

Član 33. ***(Prenošenje poslova gospodarenja državnim šumama)***

- (1) Na području Kantona posluje Kantonalno šumsko-privredno društvo (korisnik državnih šuma).
- (2) Skupština Tuzlanskog kantona, na prijedlog Vlade Kantona, uz prethodno pribavljeno mišljenje Ministarstva, a na inicijativu općine, općina ili grada može donijeti odluku o osnivanju više kantonalnih šumsko-privrednih društava.
- (3) Općina, općine ili grad uz inicijativu iz stava (2) ovog člana, prilaže stručni elaborat o opravdanosti formiranja više kantonalnih šumsko-privrednih društava, koji mora izraditi visokoškolska ili naučno-istraživačka ustanova iz oblasti šumarstva.
- (4) Minimalna teritorija kojom može gospodariti jedno šumsko-privredno društvo je šumsko-privredno područje.
- (5) Ministarstvo ugovorom prenosi poslove gospodarenja državnim šumama korisniku državnih šuma, a posebno: izradu šumsko-privrednih osnova, izradu privremenih godišnjih planova gospodarenja, izradu godišnjih planova gospodarenja, izradu projekata za izvođenje radova u šumarstvu i njihovu realizaciju, projektovanje, izgradnju, rekonstrukciju i održavanja šumske infrastrukture, prometa šumskih drvnih sortimenata i nedrvnih šumskih proizvoda, izvršavanje programa i planova biološke obnove šuma, provođenje mjera zaštite šuma,

proizvodnje i prometa šumskog sjemena, šumskog i ukrasnog sadnog materijala, izvršavanje planova korišćenja nedravnih šumskih proizvoda, realizaciju planova razvoja šumarstva i mjera racionalizacije u šumarstvu, ostale poslove, zadatke i odgovornosti u skladu sa ugovorom.

(6) Korisnik državnih šuma obavezan je šumske drvne sortimente prodavati po tržišnim uslovima i cijenama.

Član 34.

(Vođenje evidencija o izvršenim radovima)

Korisnik državnih šuma za državne šume, a pravno lice registrovano za obavljanje poslova u šumarstvu za privatne šume, dužni su voditi evidenciju o izvršenim radovima i provedenim mjerama predviđenim šumsko-razvojnim planom, šumsko-privrednom osnovom, privremenim godišnjim planom gospodarenja, godišnjim planom gospodarenja i projektom za izvođenje radova u šumarstvu. Podaci se evidentiraju za proteklu godinu i dostavljaju Kantonalnoj upravi najkasnije do 28. februara tekuće godine za prethodnu godinu.

Član 35.

(Naknada za korišćenje državnih šuma)

Korisnik državnih šuma dužan je plaćati naknadu u visini od 7% ostvarenog prihoda od drveta računajući cijenu drveta na panju i prihoda ostvarenog od nedravnih šumskih proizvoda, u skladu sa odredbama člana 48. ovog Zakona.

Član 36.

(Dostava katastra šuma)

Kantonalna uprava je dužna Federalnoj upravi za šumarstvo dostaviti katastar državnih i privatnih šuma najdalje do 31. marta tekuće godine za prethodnu godinu, sa evidentiranim svim promjenama u toku godine.

Član 37.

(Korišćenje parcela trećih lica)

Korisnik državnih šuma, odnosno vlasnik privatne šume, dužan je da uz naknadu dozvoli privremeni prijevoz (prinudni put) ili smještaj šumskih proizvoda sa susjednih parcela na šumi i šumskom zemljištu, ako to nije moguće izvršiti na drugi način ili ako bi drugi način bio nesrazmjerno skuplji.

Član 38.

(Stručni šumarski ispit)

(1) Za obavljanje stručnih poslova u šumarstvu polaže se stručni šumarski ispit i mogu ga polagati diplomirani inženjeri šumarstva (VII stepen stručne spreme), odnosno osobe koje imaju visoko obrazovanje po Bolonjskom sistem studiranja sa najmanje 240 ECTS bodova i najmanje dvije godine radnog iskustva u struci nakon sticanja zvanja diplomiranog inženjera šumarstva (VII stepen stručne spreme), odnosno odgovarajućeg zvanja po Bolonjskom sistem studiranja sa najmanje 240 ECTS bodova, pred nadležnim federalnim organom.

(2) Izuzetno od stava (1) ovog člana, polaganja stručnog šumarskog ispita oslobođeni su diplomirani inženjeri šumarstva (VII stepen stručne spreme) sa više od deset godina radnog iskustva u struci nakon sticanja zvanja diplomiranog inženjera šumarstva, specijalisti, magistri šumarskih nauka i doktori šumarskih nauka.

XII PROMJENA NAMJENE ŠUMSKOG ZEMLJIŠTA I GRADNJA U ŠUMI

Član 39.

(Izdvajanje šuma iz šumsko-privrednog područja)

(1) Vlada Kantona, na prijedlog Ministarstva, a na zahtjev Oružanih snaga Bosne i Hercegovine i policijskih struktura, može dijelove šuma i šumskog zemljišta izdvojiti iz šumskoprivrednog područja.

(2) Vlada Kantona može, na prijedlog Ministarstva, a po prethodnom zahtjevu općine/grad uz elaborat i uz prethodno pribavljeno mišljenje Kantonalne uprave, dijelove šuma i šumskog zemljišta, izdvojiti iz šumsko-privrednog područja i prenijeti općini/gradu na korišćenje u druge svrhe, koje daju veću trajnu korist.

(3) Podnosilac zahtjeva iz stava (1) i (2) ovog člana mora platiti naknadu u visini koja se određuje u skladu sa odredbama Zakona o eksproprijaciji („Službene novine Federacije Bosne i Hercegovine“, broj: 7/07, 36/10, 25/12 i 34/16). Naplaćena sredstva su namjenski prihod Budžeta Kantona.

Član 40.

(Krčenje šuma)

(1) Zabranjeno je krčenje šuma izuzev ako se radi o izgradnji objekata planiranih važećim planom prostornog uređenja u slučajevima kada se time postižu veće trajne koristi i ako neće biti štetnih posljedica za okoliš.

(2) Dozvolu za krčenje šuma izdaje Ministarstvo.

(3) Zahtjev za krčenje šuma može podnijeti vlasnik privatne šume, koncesionar i drugo ovlašćeno lice, u skladu sa odredbama ovog Zakona i podnosi se Ministarstvu, uz slijedeću dokumentaciju: izvadak iz važećeg plana prostornog uređenja, izvadak iz zemljišnih knjiga i kopiju katastarskog plana, koncesioni ugovor ako se radi o koncesiji, okolinsku dozvolu u skladu sa propisima o zaštiti okoliša, saglasnost organa nadležnog za zaštitu historijskog i prirodnog naslijeđa, akt organa nadležnog za vodoprivredu i mišljenje Kantonalne uprave.

(4) Dozvola za krčenje šuma važi dvije godine od dana izdavanja.

(5) Ako se u roku od dvije godine od dana izdavanja dozvole iskrčeno zemljište ne privede namjeni radi koje je krčenje izvršeno, korisnik iskrčenog zemljišta dužan je izvršiti njegovo pošumljavanje.

(6) Podnosilac zahtjeva za krčenje šuma obavezan je uplatiti naknadu čija vrijednost se određuje u visini troškova podizanja i održavanja novih šuma na površini koja ne može biti manja od površine za koju je data dozvola za krčenje šuma i tržišnoj vrijednosti drveta koja se dobije sječom. Naknada se uplaćuje kao namjenski prihod Budžeta Kantona, i ista se može koristiti samo u svrhu podizanja novih šuma i kupovinu šuma u skladu sa odredbama ovog Zakona. Kontrolu uplate naknade vrši Kantonalna uprava i Kantonalna uprava za inspeksijske poslove.

Član 41.

(Gradnja u šumi)

(1) U šumi i na šumskom zemljištu može se graditi samo šumska infrastruktura, objekti potrebni za gospodarenje šumama, u skladu sa važećom šumsko-privrednom osnovom i lovno uzgojni i lovno tehnički objekti, u skladu sa važećom lovno-privrednom osnovom.

(2) Izuzetno od stava (1) ovog člana, u šumi i na šumskom zemljištu mogu se graditi objekti predviđeni važećim planom prostornog uređenja.

(3) Općina/grad ili investitor izgradnje objekata predviđenih planom prostornog uređenja je obavezan pribaviti dozvolu za krčenje šuma iz člana 40. ovog Zakona, osim za objekte iz stava (1) ovog člana.

(4) Imovinsko-pravni odnosi za objekte iz stava (2) ovog člana, rješavaju se u skladu sa odredbama Zakona o eksproprijaciji, osim za objekte komunalne i prometne infrastrukture čiji je investitor općina/grad koja je oslobođena plaćanja naknade za eksproprijaciju.

Član 42.

(Davanje državnih šuma u zakup)

(1) Zabranjeno je davanje u zakup državnih šuma.

(2) Izuzetno od stava (1) ovog člana, Ministarstvo može pojedine državne šume ugovorom davati u zakup, radi postavljanja privremenih objekata za potrebe upravljanja i ostvarivanja drugih aktivnosti JU Zaštićeni pejzaž „Konjuh“, postavljanja objekata za koje je Vlada Tuzlanskog kantona donijela Odluku o pristupanju dodjeli koncesije i određivanju koncesora, za potrebe GSM baznih stanica, vazdušne priključke za niskonaponsku, PTT mrežu, kao i priključke građana sa važećim odobrenjem za građenje na komunalne instalacije kao što su vodovod, kanalizacija i plin, uzgoja divljači i podizanja višegodišnjih nasada, ukoliko se time ne narušavaju funkcije šume.

(3) Prije sklapanja ugovora iz stava (2) ovog člana, potrebno je pribaviti mišljenje Kantonalnog pravobranilaštva.

(4) Naknada koja se ostvaruje po osnovu ugovora iz stava (2) ovog člana, uplaćuje se u korist Budžeta Kantona.

(5) Ukoliko se državnim šumama mijenja namjena, podnosilac zahtjeva za zakup obavezan je uplatiti naknadu za krčenje šuma iz člana 40. stav (6) ovog Zakona bez provođenja procedure za krčenje šuma.

(6) Vlada Kantona, na prijedlog Ministarstva, donosi pravilnik o uslovima i načinu davanja državnih šuma u zakup i uspostavi prava služnosti.

Član 43.

(Uspostava prava služnosti)

(1) U državnim šumama se može uspostaviti pravo služnosti u svrhu izgradnje vodovoda, kanalizacije, plinovoda, električnih vodova (sa pratećim objektima), postavljanja objekata za koje je Vlada Tuzlanskog kantona donijela Odluku o pristupanju dodjeli koncesije i određivanju koncesora, služnosti puta, kao i za druge namjene ako je proglašen javni interes u skladu sa odredbama Zakona o eksproprijaciji.

(2) Ugovor kojim se uspostavlja pravo služnosti zaključuje se između korisnika služnosti i Ministarstva.

(3) Naknada koja se ostvaruje po osnovu prava služnosti uplaćuje se u korist Budžeta Kantona.

(4) Korisnik služnosti obavezan je uplatiti naknadu iz člana 40. stav (6) ovog Zakona, bez provođenja procedure za krčenje šume.

(5) Prije sklapanja ugovora iz stava (2) ovog člana, potrebno je pribaviti mišljenje Kantonalnog pravobranilaštva.

XIII ŠUMARSKE INSTITUCIJE

Član 44.

(Kantonalna uprava za šumarstvo)

(1) Kantonalna uprava za šumarstvo je uprava u sastavu Ministarstva.

(2) Sjedište Kantonalne uprave je u Tuzli.

Član 45.

(Poslovi Kantonalne uprave za šumarstvo)

- (1) Kantonalna uprava obavlja upravne, stručne i druge poslove:
 - a) Obezbjedi neposrednu zaštitu državnih šuma putem čuvarske službe;
 - b) prikuplja podatke i vodi bazu podataka o stanju i razvoju svih šuma i vodi katastar šuma i šumskog zemljišta na području Kantona i dostavlja ih Federalnom ministarstvu poljoprivrede, vodoprivrede i šumarstva i Federalnoj upravi za šumarstvo;
 - c) priprema kantonalni šumsko-razvojni plan i podnosi ga Ministarstvu;
 - d) izrađuje elaborat za formiranje šumsko-privrednih područja;
 - e) vrši nadzor nad prikupljanjem podataka i izradom šumsko-privrednih osnova za privatne šume i nadzor nad prikupljanjem podataka za izradu šumsko-privrednih osnova za državne šume;
 - f) prati realizaciju šumsko-privrednih osnova putem godišnjih planova gospodarenja šumama;
 - g) vodi evidenciju objekata za proizvodnju i doradu šumskog sjemena i proizvođača šumskog i ukrasnog drveća i grmlja;
 - h) obavlja poslove dijagnostično prognozne službe i prati stanje i stepen oštećenosti šuma i o tome obavještava Ministarstvo;
 - i) prati izvršenje svih ugovornih obaveza koji se odnose na državne šume;
 - j) prati realizaciju programa zaštite šuma;
 - k) usaglašava šumsko-privredne osnove sa prostornim planovima, planom upravljanja vodama, lovno privrednim osnovama, evidencijama koje se vode u Zavodu za zaštitu kulturno historijskog i prirodnog naslijeđa i planovima upravljanja mineralnim sirovinama;
 - l) prati i analizira ekonomsko stanje u oblasti šumarstva na području Kantona i podatke dostavlja Ministarstvu;
 - m) priprema i izrađuje programe iz oblasti šumarstva, koji se finansiraju ili sufinansiraju iz namjenskih sredstava Budžeta Kantona;
 - n) priprema i daje mišljenje za proglašenje zaštitnih šuma i šuma sa posebnom namjenom na način propisan ovim Zakonom;
 - o) organizuje savjetovanja i pruža stručnu pomoć korisniku državnih šuma i vlasnicima privatnih šuma;
 - p) izrađuje planove za izgradnju i održavanje šumskih putnih komunikacija koji se finansiraju iz Budžeta Kantona, uz saglasnost Ministarstva;
 - r) upoznaje javnost sa stanjem šuma i izdaje odgovarajuće stručno-popularne publikacije o stanju šuma i njihovom značaju;
 - s) izrađuje godišnji plan rada, finansijski plan i godišnji izvještaj i iste dostavlja Ministarstvu;
 - š) obavlja i druge poslove i zadatke koji proizlaze iz ovog Zakona, Zakona o ministarstvima i drugim organima uprave Tuzlanskog kantona, kao i po zahtjevu Ministarstva.
- (2) Kantonalna uprava dostavlja Ministarstvu sve tražene podatke u cilju sagledavanja stanja šumarstva na području Kantona.

Član 46.

(Čuvanje šuma)

- (1) Čuvarska služba formira se unutar Kantonalne uprave.
- (2) Čuvari šuma mogu biti lica koja su završila srednju šumarsku školu III ili IV stepena, koja ispunjavaju uslove za nošenje oružja i druge uslove za obavljanje javne službe.

(3) Čuvari šuma su ovlaštene službene osobe i imaju ovlaštenja u skladu sa ovim Zakonom.

(4) Čuvari šuma službu obavljaju u uniformi, moraju biti naoružani i moraju posjedovati dokument - legitimaciju čuvara šuma čiji oblik i sadržaj propisuje ministar, a kojom potvrđuju status čuvara šuma. Legitimaciju imaju i druga stručna lica koja imaju ovlaštenje za poslove zaštite šuma.

(5) Dužnosti čuvara šuma su da:

- a) čuva šumu od šumskih požara na način kako je utvrđeno ovim Zakonom i planovima zaštite šuma od požara;
- b) čuva šumu od bespravnog zauzimanja i korišćenja, od bespravnih sječa, sprečava bespravnu izgradnju u šumi i na šumskim zemljištima;
- c) evidentira bespravno posječena stabla u propisane obrasce i obilježava ih;
- d) prati pojave i kretanje biljnih bolesti i štetočina i štete nanesene šumi od divljači;
- e) prati stanje divljači;
- f) prati održavanje šumskog reda;
- g) sprečava nezakonito pokretanje drveta iz šume, ubiranje i sakupljanje nedrvenih proizvoda i stavljanje istih u promet;
- h) zaustavlja prijevozna sredstva i pregleda prateću dokumentaciju za prijevoz šumskih sortimenata;
- i) pregleda porijeklo drveta na pilanama i na svim drugim mjestima gdje se drvo drži;
- j) pregleda transport na šumskim putevima;
- k) sprečava odlaganje smeća i drugog otpada u šumu i uništavanje graničnih znakova;
- l) sačinjava zapisnik o protivpravnoj radnji;
- m) legitimira sva lica zatečena u vršenju prekršajnih radnji po ovom Zakonu i krivičnih djela koja se odnose na šume ili za koja postoji osnovana sumnja da su izvršila takva djela;
- n) obavještava Kantonalnu upravu, policijsku stanicu i Kantonalnu upravu za inspeksijske poslove o svim zapaženim nepravilnostima.

(6) Čuvar šuma obavezan je, u skladu sa svojim dužnostima iz stava (5) ovog člana, za sve bespravne aktivnosti, bez odlaganja sačiniti zapisnik, na osnovu kojeg Kantonalna uprava pokreće postupak kod nadležnog organa.

(7) Na zahtjev čuvara šuma, svako lice je dužno pokazati lične isprave kojim se utvrđuju njegov identitet i dokumentaciju za drvo i ostale šumske proizvode u prijevozu ili koji su uskladišteni.

XIV FINANSIRANJE

Član 47.

(Izvori namjenskih sredstava)

(1) Radi ostvarivanja općeg interesa i dugoročnih ciljeva održivog gospodarenja šumama utvrđenih šumsko-privrednim osnovama, prikupljaju se finansijska sredstva za zaštitu i unaprijeđenje stanja postojećih i podizanja novih šuma i ruralni razvoj.

(2) Sredstva iz stava (1) ovog člana, obezbjeđuju se iz naknada:

- a) za obavljanje stručnih poslova u privatnim šumama iz člana 32. stav (2) ovog Zakona;
- b) za korišćenje državnih šuma iz člana 35. ovog Zakona;
- c) za izdvajanje šuma iz šumsko-privrednog područja iz člana 39. stav (3) ovog Zakona;
- d) za krčenje šume iz člana 40. stav (6) ovog Zakona;

- e) od zakupa državnih šuma iz člana 42. stav (2) ovog Zakona;
- f) po osnovu prava služnosti iz člana 43. stav (3) ovog Zakona;
- g) za općekorisne funkcije šuma iz člana 49. ovog Zakona;
- h) ostalih izvora u skladu sa ovim Zakonom i drugih izvora.

(3) Sredstva iz stava (2) ovog člana, predstavljaju namjenska sredstva i uplaćuju se u Budžet Kantona, izuzev sredstava utvrđenih članom 48. stav (1) tačka b).

(4) Ministar donosi Uputstvo o načinu obračunavanja, rokovima i postupku plaćanja naknada propisanih ovim Zakonom, i uplatnim računima na koje se usmjeravaju sredstva, kao i o obliku i sadržaju obrasca za obračun naknada iz stava (2) tačke b) i g) ovog člana.

(5) Ministar, na prijedlog Kantonalne uprave, donosi odluku o iznosu naknade iz stava (2) tačka a) ovog člana.

Član 48.

(Uplata naknade za korišćenje državnih šuma)

(1) Naknada za korišćenje državnih šuma iz člana 35. ovog Zakona obračunava se od prihoda od drveta računajući cijenu drveta na panju i prihoda ostvarenog od nedrvnih šumskih proizvoda i uplaćuje se u korist računa javnih prihoda Budžeta Kantona koju kantonalni trezor raspoređuje u sljedećem omjeru:

- a) 2,0 % od osnovice, odnosno 28,5714 % od iznosa uplate, na račun Budžeta Kantona,
- b) 5,0 % od osnovice, odnosno 71,4286 % od iznosa uplate, na račune općina/grada gdje se nalazi šuma u kojoj je izvršena sječa.

(2) Naknada iz stava (1) ovog člana uplaćuje se po ostvarenom prihodu, tromjesečno i po završnom godišnjem računovodstvenom izvještaju.

(3) Kontrolu obračuna i uplate naknade iz stava (1) ovog člana vrši šumarski inspektor.

(4) Ako obveznik plaćanja naknade ne obračuna ili ne uplati naknadu iz stava (1) ovog člana na način propisan u stavu (1) ovog člana, šumarski inspektor koji je izvršio kontrolu uplate sredstava, po pravosnažnosti i izvršnosti rješenja o uplati sredstava koje je ispostavio obvezniku, podnosi nadležnom sudu prijedlog za prinudno izvršenje ove novčane obaveze,

Član 49.

(Naknada za općekorisne funkcije šuma)

(1) Naknadu za općekorisne funkcije šuma u visini od 0,05 % ukupno ostvarenog prihoda, plaćaju sva pravna lica koja su registrovana za obavljanje djelatnosti i imaju sjedište na teritoriji Kantona, kao i djelovi pravnih lica čije je sjedište van Kantona, a obavljaju djelatnost na teritoriji Kantona.

(2) Naknada iz stava (1) ovog člana uplaćuje se tromjesečno i po završnom godišnjem računovodstvenom izvještaju u korist računa Budžeta Kantona.

(3) Od obaveze plaćanja naknade iz stava (1) ovog člana izuzimaju se: korisnik državnih šuma, javne institucije, humanitarne organizacije, udruženja i fondacije, izuzev onih koji obavljaju djelatnost radi sticanja dobiti.

(4) Kontrolu obračuna i uplate naknade iz stava (1) ovog člana vrši poreska uprava i šumarski inspektori na način predviđen u članu 48. stav (4) ovog Zakona.

Član 50.

(Korišćenje namjenskih sredstava koja su prihod Kantona)

(1) Iz namjenskih sredstava Budžeta Kantona prikupljenih po osnovu člana 47. stav (2) ovog Zakona, finansiraju se sljedeći poslovi:

- a) rad čuvarske službe;

- b) izrada i revizija kantonalnog šumsko-razvojnog plana;
- c) izrada šumsko-privrednih osnova za privatne šume i nadzor nad prikupljanjem podataka za izradu šumsko-privrednih osnova za državne i privatne šume;
- d) biološka obnova šuma u obimu većem od predviđenog šumsko-privrednom osnovom;
- e) obnova šuma od posljedica elementarnih nepogoda, prenamnoženja insekata, požara i slično;
- f) unaprijeđenje proizvodnje šumskog reproduktivnog materijala;
- g) gospodarenje šumama koje su od vitalnog interesa u skladu sa članom 17. stav (3) ovog Zakona;
- h) organizovanje specijalističkih kurseva iz oblasti šumarstva;
- i) očuvanje i unapređenje bioraznolikosti šumskih ekosistema;
- j) očuvanje i unapređenje genofonda, rijetkih i ugroženih vrsta šumskog drveća;
- k) naučna istraživanja i stručne analize;
- l) izgradnja i održavanje šumskih puteva;
- m) druge namjene za unapređenje šuma.

(2) Sredstva iz stava (1) ovog člana troše se po Programu utroška sredstava, koji na prijedlog Kantonalne uprave donosi ministar, a na koji saglasnost daje Vlada Kantona.

Član 51.

(Raspologanje sredstvima koja su prihod općina/grada)

Sredstvima iz člana 48. ovog Zakona općine/grad mogu slobodno raspolagati, u okviru svoje nadležnosti.

XV NADZOR NAD PROVOĐENJEM ZAKONA

Član 52.

(Upravni nadzor)

(1) Ministarstvo vrši upravni nadzor nad primjenom ovog Zakona i propisa donesenih na osnovu ovog Zakona.

(2) Ministarstvo putem Kantonalne uprave vrši uvid i kontrolu postupanja, pregled akata i dokumentacije koju donose institucije i upravne organizacije u vršenju javnih ovlašćenja, daje instrukcije i smjernice za izvršavanje poslova i traži podatke i obavještenja o izvršavanju poslova u vršenju javnih ovlašćenja.

Član 53.

(Inspeksijski nadzor)

(1) Inspeksijski nadzor nad primjenom ovog Zakona i propisa donesenih na osnovu ovog Zakona vrši Kantonalna uprava za inspeksijske poslove putem šumarske inspekcije.

(2) Inspeksijski nadzor se vrši u skladu sa Zakonom o organizaciji organa uprave u Federaciji Bosne i Hercegovine („Službene novine Federacije Bosne i Hercegovine“, broj: 35/05) i Zakonom o inspekcijama Tuzlanskog kantona-prečišćeni tekst („Službene novine Tuzlanskog kantona“, broj: 10/12, 13/15, 09/16).

Član 54.
(Ovlašćenja šumarskih inspektora)

(1) Pored ovlašćenja i dužnosti određenih posebnim zakonom, šumarski inspektor je ovlašten i dužan da:

- a) pregleda šumsko-privredne osnove, godišnje planove gospodarenja, šumsko-razvojne planove i programe, izvedbene projekte, planove proste i proširene biološke reprodukcije šuma i planove zaštite šuma, njihovo izvršenje, poslovne knjige i ostalu dokumentaciju;
 - b) traži da mu se stavi na raspolaganje i pregleda svu dokumentaciju i informacije potrebne za inspekcijski pregled;
 - c) pregleda sve šumske radove, objekte, uređaje, pilane, kao i sva mjesta gdje se drvo sječe, smješta, prerađuje, izvozi iz šume ili stavlja u promet;
 - d) kontroliše i prati primjenu standarda iz oblasti šumarstva;
 - e) privremeno obustavi sječe i sve druge radnje koje nisu u skladu sa odredbama ovog Zakona i drugih propisa iz oblasti šumarstva do konačne odluke nadležnog organa;
 - f) pregleda odabiranje i doznaku stabala za sječu;
 - g) zaustavlja prijevozna sredstva i pregleda prateću dokumentaciju za prevoz šumskih sortimenata;
 - h) pregleda izvršenje svih radova koji su predviđeni šumsko-privrednim osnovama, šumskim planovima i programima i projektima za izvođenje;
 - i) u hitnim slučajevima u kojima bi nastupila šteta po javni interes, na licu mjesta i rješenjem naređuje obustavu rada i sprovođenje mjera za sprečavanje šteta;
 - j) privremeno oduzima bespravno posječeno drvo i nezakonito stavljeno u promet drvo i nedrvne šumske proizvode, kao i predmete kojima su izvršene nezakonite radnje;
 - k) pregleda kako se provodi utvrđivanje zdravstvenog stanja šuma i mjera za suzbijanje biljnih bolesti i štetočina i naredi otklanjanje nedostataka i provođenje mjera, ako se utvrdi da se korisnik državnih šuma i vlasnici šuma ne pridržavaju propisa i mjera zdravstvene zaštite;
 - l) pregleda planove zaštite šuma od požara i sprovođenje predviđenih mjera i naredi otklanjanje nedostataka;
 - m) pregleda sprovođenje mjera na zaštiti šuma i šumskih zemljišta od protivpravnog prisvajanja i korištenja i bespravne izgradnje objekata;
 - n) vrši nadzor nad sprovođenjem propisa o proizvodnji i prometu šumskog sjemena i šumskog sadnog materijala;
 - o) vrši nadzor sprovođenja drugih mjera za zaštitu šuma i propisnog uspostavljanja i održavanja šumskog reda i vršenja neposrednog čuvanja šuma;
 - p) prikuplja potrebne podatke i obavještenja od odgovornih lica, svjedoka, vještaka i drugih lica kada je to potrebno za vršenje nadzora;
 - r) pokreće i vodi inspekcijski nadzor po službenoj dužnosti kao i po zahtjevu svih pravnih fizičkih lica i da o konstatovanom stanju i poduzetim mjerama pismeno obavijesti podnosioca zahtjeva;
 - s) upoznaje javnost sa konstatovanim stanjem šuma i o preduzetim mjerama na otklanjanju nedostataka;
 - š) saraduje sa inspekcijskim organima iz drugih oblasti, pravosudnim organima i organima policije;
 - t) preduzima i druge mjere i radnje za koje je ovlašten ovim Zakonom i drugim propisima.
- (2) Šumarski inspektori su, pored navedenog, dužni da u određenim rokovima i na propisan način dostavljaju izvještaje i potrebne podatke Ministarstvu.

Član 55. *(Upravne mjere)*

(1) Ako šumarski inspektor prilikom vršenja inspeksijskog nadzora ustanovi da propis nije primijenjen ili da je nepravilno primijenjen donijet će rješenje kojim će zabraniti rad zbog nepoštivanja odredbi člana 54. stav (1) tačke b), c), d), f), h), i), m) i n) ovog Zakona ili naložiti otklanjanje utvrđenih nepravilnosti i odrediti rok u kome se one moraju otkloniti.

(2) Protiv rješenja šumarskog inspektora može se izjaviti žalba Ministarstvu u roku od osam dana od dana prijema rješenja.

(3) Rješenje o žalbi iz stava (2) ovog člana je konačno i protiv njega nije dopuštena žalba, ali se može pokrenuti upravni spor.

(4) Žalba na rješenje iz stava (2) ovog člana ne odlaže izvršenje rješenja.

(5) Šumarski inspektor koji je donio rješenje i organ kome je žalba izjavljena mogu, na obrazloženje žalioaca, odložiti izvršenje naloženih mjera, ako žalilac učini vjerovatnim da bi usljed izvršenja tih mjera bili ugroženi životi i zdravlje ljudi, nastupila znatna materijalna šteta koja se na drugi način ne može otkloniti, a odlaganje se ne protivi opštem interesu.

XVI KAZNENE ODREDBE

Član 56.

(1) Novčanom kaznom od 5.000 do 15.000 KM kažnjava se korisnik državnih šuma ili drugo pravno lice ako:

- a) gospodari šumama bez šumsko-privredne osnove, privremenog godišnjeg plana gospodarenja, godišnjeg plana gospodarenja i projekta za izvođenje radova u šumarstvu (član 4. stav (1));
- b) prekorači ukupan obim sječa u visokim šumama sa prirodnom obnovom predviđen šumskoprivrednom osnovom za planski period (član 4. stav (3));
- c) pravovremeno ne osigura i izradi i u roku ne dostavi novoizrađenu šumsko-privrednu osnovu (član 4. stav (10));
- d) izradi Projekat za izvođenje radova u šumarstvu suprotno odredbama člana (6. stav (1) i (2));
- e) ne izradi i ne donese Projekat za izvođenje radova u šumarstvu (član 6. stav (4) i (5));
- f) vrši sječ u šume prije odabiranja i doznake stabala za sječ (član 7. stav (1));
- g) ne obavlja poslove biološke obnove šuma (član 9.);
- h) dozvoli ili izvrši sječ u šuma na uzurpiranom državnom zemljištu suprotno odredbi (člana 15. stav (5));
- i) ako ne postupa u skladu sa članom 20. stav (3);
- j) u šumi i na šumskom zemljištu vrši upotrebu hemijskih sredstava, odlaganje otpada, smeća ili zagađujućih tvari (član 21.);
- k) vrši ili odobrava iskorišćavanje nedravnih šumskih proizvoda suprotno odredbama člana 24. stav (1) i (3);
- l) ako ne prodaje šumske drvne sortimente po tržišnim uslovima i cijenama (član 33. stav (6));
- m) ako postupa suprotno odredbama člana 40.;
- n) u šumi ili na šumskom zemljištu otpočne radove na izgradnji objekata ili gradi objekte suprotno odredbama člana 41.

(2) Za prekršaj iz stava (1) ovog člana kažnjava se novčanom kaznom u iznosu od 1.000 do 3.000 KM i odgovorno lice u pravnom licu.

(3) Za prekršaj iz stava (1) tačke f) i h), izreći će se i zaštitna mjera oduzimanja drveta i nedravnih šumskih proizvoda koji su nastali počinjenjem prekršaja i sredstava kojima je počinjen prekršaj.

(4) Za prekršaj iz stava (1) tačka n) kažnjava se novčanom kaznom u iznosu od 1.000 do 3.000 KM odgovorno lice u općini/gradu.

Član 57.

(1) Novčanom kaznom od 4.000 do 12.000 KM kažnjava se za prekršaj korisnik državnih šuma ili drugo pravno lice ako:

- a) ne prijavi sječu nadležnom šumarskom inspektor i u određenom roku ne otkloni štete na zemljištu u skladu sa odredbama člana 7. stav (2) i (3);
- b) prije sječe o sječi ne obavijesti Kantonalnu upravu i općinu/grad na čijem se području vrši sječa (član 7. stav (5));
- c) vrši doznaku i sječu stabala u šumama za koje imovinsko-pravni odnosi nisu riješeni i granice utvrđene i na terenu vidno i na propisan način obilježene (član 8. stav (4));
- d) angažuje zaposlenike suprotno odredbama člana 11. stav (1);
- e) dozvoli ili vrši čistu sječu ili druge oblike pustošenja šuma (član 12. stav (1));
- f) ako ne postupa u skladu sa odredbama člana 13. stav (2);
- g) loži ili dozvoli loženje vatre suprotno odredi člana 20. stav (1);
- h) ako postupi suprotno odredbi člana 20. stav (2);
- i) ako ne postupa u skladu sa odredbom člana 23;
- j) izgradi šumsku infrastrukturu suprotno odredbama člana 26;
- k) vrši promet šuma i šumskog zemljišta suprotno odredbama člana 31. stav (1) i (2);
- l) ne izvršava poslove u skladu sa članom 31. stav (4);
- m) ne izvrši obavezu iz člana 48. stav (1) i (2);
- n) ne izvrši obavezu iz člana 49. stav (1) i (2);
- o) ne postupi po rješenju šumarskog inspektora u roku i način koji je inspektor odredio (član 55. stav (1)).

(2) Za prekršaj iz stava (1) ovog člana kažnjava se novčanom kaznom u iznosu od 800 do 2.500 KM i odgovorno lice u pravnom licu.

Član 58.

(1) Novčanom kaznom u iznosu od 3.000 do 9.000 KM kažnjava se za prekršaj korisnik šume ili drugo pravno lice ako:

- a) vrši radove bez saglasnosti Kantonalne uprave (član 5. stav (3));
- b) ne dostavi godišnji plan gospodarenja u skladu sa članom 5. stav (4);
- c) ne izvodi radove u skladu sa projektom (član 6. stav (1));
- d) u roku od dvije godine ne izvrši radove predviđene projektom za izvođenje radova u šumarstvu ili ne vodi registar projekata za izvođenje radova u šumarstvu (član 6. stav (2) i (7));
- e) odredi lice za izradu projekta za izvođenje radova u šumarstvu u suprotnosti sa odredbom člana 6. stav (3);
- f) doznaku stabala za sječu vrši lice koje ne ispunjava uslove iz člana 8. stav (2) i (3);
- g) ne izvrši tehnički prijem radova i ostale obaveze u skladu sa odredbama člana 10.;
- h) ne izvrši pošumljavanje sječina u roku od dvije godine (član 12. stav (2));
- i) ne izradi plan u skladu sa članom 14. stav (1);
- j) pokreće drvo, dijelove stabala i grane ili stavlja u promet drvo koje nije žigosano i snabdjeveno otpretnim iskazom (član 15. stav (1));

- k) stavlja u promet nedrvne šumske proizvode bez odobrenja (član 15. stav (3));
 - l) u periodu vegetacije od 01. aprila do 01. novembra, drvo četinara i brijesta uskladištava i stavlja u promet suprotno članu 15. stav (8);
 - m) vrši ili dozvoljava pašu, žirenje, brst, kresanje grana i lisnika u suprotnosti sa članom 22.;
 - n) vrši ili dozvoli sječu pančićeve omorike, tise, mečije lijeske, planinskog javora, planinskog bora, zelene johe, munike i zanovjeti suprotno odredbama člana 25.;
 - o) odobri korišćenje šumskih puteva suprotno odredbama člana 27. stav (2);
 - p) vrši radnje suprotno odredbama člana 28. stav (2);
 - r) počini ili dozvoli neovlašteno zauzimanje šuma ili šumskog zemljišta (član 30. stav (2));
 - s) ne vodi evidencije o izvršenim radovima i provedenim mjerama predviđenim šumsko-razvojnim planovima, šumsko-privrednom osnovom, privremenim planom gospodarenja, godišnjim planom gospodarenja i projektima za izvođenje radova u šumarstvu ili evidentirane podatke ne dostavi u predviđenom roku (član 34);
 - š) roku od dvije godine zemljište ne privede namjeni radi koje je krčenje izvršeno ili ne izvrši njegovo pošumljavanje (član 40. stav (5));
 - t) ne vrši uplatu sredstava u Budžet Kantona u skladu sa odredbama člana 47.
- (2) Za prekršaj iz stava (1) ovog člana kažnjava se novčanom kaznom u visini od 500 do 1.500 KM i odgovorno lice u pravnom licu.
- (3) Za prekršaj iz stava (1) tačka j) izreći će se i zaštitna mjera oduzimanja predmeta sa kojima je počinjen prekršaj ili koji su nastali počinjenjem prekršaja.

Član 59.

- (1) Novčanom kaznom u iznosu od 500 - 1.500 KM kažnjava se za prekršaj fizičko lice ako:
- a) vrši šumsko-uzgojne radove i sječu šume suprotno odredbama člana 6. stav (6);
 - b) vrši sječu bez prethodno izdatog rješenja i doznake (član 8. stav (5));
 - c) ne izvrši pošumljavanje sječina u roku od dvije godine (član 12. stav (2));
 - d) ne izvrši sanitarnu sječu i ne uspostavi i održava šumski red (član 13. stav (2));
 - e) pokreće drvo, dijelove stabala i grane ili stavlja u promet drvo bez žigosanja i otpremnog iskaza (član 15. stav (1));
 - f) stavlja u promet nedrvne šumske proizvode bez odobrenja (član 15. stav (3));
 - g) posječe ili dozvoli sječu šume na uzurpiranom državnom zemljištu, na kome imovinsko-pravni odnosi nisu raspravljani ili posječe ili dozvoli sječu drveta bez prethodne doznake ili prisvoji tako posječenu drvenu masu, ili stavlja u promet drvo ili nedrvne šumske proizvode, suprotno odredbama člana 15. stav (5);
 - h) na zahtjev lica navedenih u članu 15. stav (6) ne pokaže lične isprave ili isprave za šumske proizvode (član 15. stav (7));
 - i) loži vatru suprotno odredbama člana 20. stav (1);
 - j) u šumi upotrebljava hemijska sredstva, odlaže otpad, smeće i zagađujuće tvari (član 21. stav (1));
 - k) postupa u suprotnosti sa članom 22.;
 - l) vrši ili dozvoli sječu pančićeve omorike, tise, lijeske mečije, planinskog javora, planinskog bora, zelene johe, munike i zanovijeti suprotno odredbama člana 25.;
 - m) vrši kretanje motornim vozilima u šumama i na šumskim zemljištima suprotno odredbama člana 27.;
 - n) vrši radnje suprotno odredbama člana 28. stav (2);
 - o) počini neovlašteno zauzimanje državnih šuma ili šumskoga zemljišta (član 30. stav (2));

- p) izvrši krčenje šume prije nego se izda dozvola za krčenje iz člana 40.;
- r) vrši izgradnju zgrada i drugih objekata suprotno odredbama člana 41. stav (1) i (3);
- s) na zahtjev čuvara šuma ne pokaže lične isprave ili isprave za šumske proizvode (član 46. stav (7).
- š) ne postupi po rješenju šumarskog inspektora u roku i na način koji je inspektor naredio (član 55. stav (1))

(2) Za prekršaj iz stava (1) tačka e) i g) izreći će se i zaštitna mjera oduzimanja drveta i nedravnih šumskih proizvoda koji su nastali počinjenjem prekršaja i sredstava kojima je počinjen prekršaja.

(3) Za prekršaj iz stava (1) tačka r) kažnjava se novčanom kaznom u iznosu od 1.000 do 3.000 KM odgovorno lice u općini/gradu koje dozvoli podizanje objekta suprotno odredbama člana 41. stav (3).

XVII PRELAZNE I ZAVRŠNE ODREDBE

Član 60. *(Preuzimanje poslova)*

Do uspostave čuvarske službe u Kantonalnoj upravi, poslove čuvarske službe će obavljati korisnik državnih šuma, u skladu sa Sporazumom koji će biti zaključen između Ministarstva i korisnika državnih šuma

Član 61. *(Prilagodavanje poslova)*

Javno preduzeće "Šume Tuzlanskog kantona" d.d. Kladnja, kao korisnik državnih šuma, dužno je svoje poslovanje uskladiti sa odredbama ovog Zakona.

Član 62. *(Započeti postupci)*

Postupci započeti prije stupanja na snagu ovog Zakona, rješavaće se u skladu sa odredbama ovog Zakona.

Član 63. *(Podzakonski propisi)*

Podzakonski propisi predviđeni ovim Zakonom donijet će se u roku od 60 dana od dana stupanja na snagu ovog Zakona.

Član 64. *(Primjena Zakona)*

Ovaj Zakon će se primjenjivati do stupanja na snagu, odnosno početka primjene Zakona o šumama koji će donijeti Parlament Federacije Bosne i Hercegovine.

Član 65.
(Prestanak važenja ranijeg Zakona)

Stupanjem na snagu ovog Zakona prestaje da važi Zakon o šumama („Službene novine Tuzlanskog kantona“ broj: 9/12, 17/13, 2/15 i 6/15.).

Član 66.
(Stupanje na snagu)

Ovaj Zakon stupa na snagu danom objavljivanja u "Službenim novinama Tuzlanskog kantona“.

Bosna i Hercegovina
Federacija Bosne i Hercegovine
TUZLANSKI KANTON
Skupština

Predsjednik Skupštine

Senad Alić, s.r.

Broj:01-02- /17
Tuzla,

O b r a z l o ž e n j e **uz Zakon o šumama**

I – USTAVNOPRAVNI OSNOV

Ustavni osnov za donošenje Zakona o šumama (u daljem tekstu: Zakon), sadržan je u odredbama člana 24. stav (1) tačka c) Ustava Tuzlanskog kantona ("Službene novine Tuzlansko-podrinjskog kantona" broj: 7/97 i 3/99 i "Službene novine Tuzlanskog kantona", broj: 13/99, 10/00, 34/02, 6/04 i 10/04), kojim je utvrđeno da Skupština Tuzlanskog kantona donosi zakone neophodne za izvršavanje nadležnosti Kantona.

II – RAZLOZI ZA DONOŠENJE

Na osnovu člana 24. stav (1) tačka c) Ustava Tuzlanskog kantona na prijedlog Vlade Tuzlanskog kantona, Skupština Tuzlanskog kantona, na sjednici održanoj 18.07.2012. godine, donijela je Zakon o šumama, koji je objavljen u "Službenim novinama Tuzlanskog kantona" broj: 9/12. Dana 28.11.2013. godine Skupština Tuzlanskog kantona je donijela Zakon o izmjenama i dopunama Zakona o šumama, koji je objavljen u "Službenim novinama Tuzlanskog kantona" broj: 17/13, 19.03.2015. godine Skupština Tuzlanskog kantona je donijela Zakon o izmjeni Zakona o šumama, koji je objavljen u "Službenim novinama Tuzlanskog kantona" broj: 2/15 i 29.04.2015. godine Skupština Tuzlanskog kantona je donijela Zakon o izmjeni Zakona o šumama, koji je objavljen u "Službenim novinama Tuzlanskog kantona" broj: 6/15.

S obzirom da je Zakon o šumama pretrpio već nekoliko izmjena i dopuna, da je od strane Kantonalne uprave za inspeksijske poslove u više navrata ukazano na nedostatke koji inspektorima otežavaju primjenu, da je Ministarstvo poljoprivrede, šumarstva i vodoprivrede u toku primjene Zakona takođe uočilo određene manjkavosti Zakona o šumama, da je u toku postupak donošenja federalnog Zakona o šumama, ali je neizvjesno kada će isti biti donesen s obzirom na brojne primjedbe na Nacrt Zakona o šuma, kao i na činjenicu da je i ranije u više navrata postojala inicijativa da se oblast šumarstva uredi na Federalnom nivou, ali do istog nije došlo, pristupilo se izradi novog kantonalnog Zakona o šumama koji će omogućiti efikasnija zakonska rješenja.

Naime, Kantonalna uprava za inspeksijske poslove ukazala je na problem u sudskim postupcima u situacijama kada se radi o prekršajima sječe drveta bez prethodne doznake, te su tražili da se precizira član 15., da se propiše obaveza korisnika državnih šuma da u slučaju komercijalnog korišćenja mineralnih sirovina trebaju postupati u skladu sa Zakonom o rudarstvu, što je učinjeno dopunom člana 24.

Član 26. (*Gradnja šumske infrastrukture*) je izmijen u cijelosti jer u ranijem tekstu Zakona o šumama nije bio jasno definisan način projektovanja i izgradnje šumskih komunikacija.

Član 28. (*Pristup šumama*) dopunjen je preciziranjem slučajeva u kojima se može odobriti sakupljanje nedravnih šumskih proizvoda, ulazak u fizički i znakovima označena šumska područja i zatvorene šumske ceste, ulazak u područja šumske ceste ili izletišta gdje se vrši sječa, ulazak u područja prirodne obnove, pošumljena područja i šumske rasadnike i ulazak u predjele i infrastrukturu koja je namijenjena za lov.

Član 42. (*Davanje državnih šuma u zakup*) dopunjen je na način da se da mogućnost zakupa na državnom šumskom zemljištu za postavljanje objekata za koje je Vlada Tuzlanskog kantona donijela Odluku o pristupanju dodjeli koncesije i određivanju koncesora.

Član 43. (*Uspostava prava služnosti*) dopunjen je na način da se da mogućnost uspostave prava služnosti na državnom šumskom zemljištu za postavljanje objekata za koje je Vlada Tuzlanskog kantona donijela Odluku o pristupanju dodjeli koncesije i određivanju koncesora.

III – OBRAZLOŽENJE PRAVNIH RJEŠENJA

U poglavlju I OPĆE ODREDBE (član 1.-3.) Zakona navedeno je da se ovim Zakonom uređuje očuvanje i zaštitu šuma i šumskog zemljišta, jačanje njihovih funkcija, planiranje u šumarstvu i upravljanje šumama i šumskim zemljištem, ekonomske funkcije, finansiranje biološke obnove šuma na teritoriji Tuzlanskog kantona, nadzor nad primjenom ovog Zakona, kaznene odredbe kao i druga pitanja od značaja za šume i šumska zemljišta. Također je data definicija šume i šumskog zemljišta kao i definicije pojmova koji se koriste u Zakonu.

U poglavlju II PLANIRANJE U ŠUMARSTVU (član 4.-6.) propisano je da se šumama na određenom području gospodari po odredbama šumsko-privredne osnove, godišnjeg plana gospodarenja i projekta za izvođenje radova u šumarstvu. Također je propisan način i uslovi donošenja i izrade šumsko-privrednih osnova za državne šume i za privatne šume, kao i period važenja istih, uslovi gazdovanja šumama ako šumsko-privredne osnove nisu važeće, obim sječa, usaglašenosti privrednih osnova sa drugim planskim dokumentima, kao i obavezno izvještavanje općine/grada o svim radovima na njenom/njegovom području.

U poglavlju III PRIVREĐIVANJE U ŠUMARSTVU (član 7.-12.) propisana je procedura odabira i obilježavanja stabala za sječu, način izvršavanja obaveza biološke obnove šuma, način izvođenja tehničkog prijema radova po izvedbenim projektima, uslovi i način izvođenja radova u šumarstvu kao i zabrana obavljanja čistih sječa.

U poglavlju IV ZAŠTITA PROTIV BIOTIČKIH I NEBIOTIČKIH AGENASA (član 13.-14.) propisan je način provođenja mjera zaštite šuma kao i obaveza obnove šuma koje su oštećene usljed djelovanja različitih faktora.

U poglavlju V PROMET DRVETA I NEDRVNIH ŠUMSKIH PROIZVODA (član 15.) propisan je način i uslovi pod kojima se može drvo i nedrvni šumski proizvodi stavlјati u promet.

U poglavlju VI ŠUME I ŠUMSKO ZEMLJIŠTE S POSEBNIM REŽIMOM GOSPODARENJA (član 16.-19.) propisan je režim gospodarenja i način proglašenja šuma sa posebnom namjenom.

U poglavlju VII ZAŠTITA ŠUMA I ŠUMSKOG ZEMLJIŠTA OD ŠTETA (član 20.-23.) propisano je na koji se način i pod kojim uslovima se može u blizini šuma ložiti vatra, graditi objekti, odlagati otpad, vršiti pašarenje i sakupljati žir.

U poglavlju VIII NEDRVNI ŠUMSKI PROIZVODI I ZAŠTITA UGROŽENIH VRSTA (član 24.-25.) propisan je uslov za gajenje i iskorištavanje nedrvnih šumskih proizvoda i ugrožene vrste čija je sječa zabranjena.

U poglavlju IX SAOBRAĆAJ U ŠUMAMA (član 26.-28.) propisan je uslov za gradnju i održavanje šumskih puteva i infrastrukture, kao i kretanje motornih vozila po šumskim komunikacijama.

U poglavlju X UPRAVLJANJE ŠUMAMA (član 29.-32.) propisano je upravljanje i uvjeti upravljanja državnim i privatnim šumama. Također je propisano da vlasnici privatnih šuma stručne poslove gospodarenja privatnim šumama prenose na Kantonalnu upravu ili na drugo pravni lice pod određenim uslovima, te da naknada za obavljanje tih stručnih poslova može iznositi najviše 10% od cijene na panju šumskih drvnih sortimenata po cjenovniku korisnika državnih šuma.

U poglavlju XI EKONOMSKE FUNKCIJE ŠUME (član 33.-38.) propisano je da na području Kantona posluje kantonalno šumsko-privredno društvo, odnosno korisnik državnih

šuma. Poslove gospdarenja državnim šumama korisniku šuma ugovorom prenosi Ministarstvo poljoprivrede, šumarstva i vodoprivrede. Propisana je i mogućnost da Skupština Kantona može donijeti odluku o osnivanju više kantonalnih šumsko-privrednih društava, na inicijativu općine/općina/ Grada a nakon pribavljene saglasnosti Ministarstva.

Također je propisano pod kojim uslovima se vrši prodaja šumskih drvnih sortimenata, način vođenja evidencija o izvršenim radovima i provedenim mjerama predviđenim šumsko-razvojnim planovima, šumsko-privrednom osnovom, godišnjim planom gospodarenja i prjektom za izvođenje. Isto tako je propisana i obaveza korisnika državnih šuma da plaća naknadu u visini 7 % od ostvarenog prihoda od drveta računajući cijenu drveta na panju i prihoda ostvarenog od nedrvnih šumskih proizvoda i to 2% u korist Budžeta Kantona, a 5% u korist općine na čijoj teritoriji se ostvaruje prihod.

U poglavlju XII PROMJENA NAMJENE ŠUMSKOG ZEMLJIŠTA I GRADNJA U ŠUMI (član 39.-43.) propisana je procedura promjene namjene šumskog zemljišta, uslovi za krčenje šuma, gradnja objekata u šumi i na šumskom zemljištu, davanje državnih šuma i šumskog zemljišta u zakup, te uslovi i način za uspostavu prava služnosti na istom.

U poglavlju XIII ŠUMARSKE INSTITUCIJE (član 44.-46.) propisani su poslovi Kantonalne uprave za šumarstvo kao i poslovi čuvara šuma.

U poglavlju XIV FINANSIRANJE (član 47.-51.) propisani su izvori sredstava za finansiranje poslova predviđenih ovim Zakonom radi ostvarivanja općeg interesa i dugoročnih ciljeva zasnovanih na principima održivog gospodarenja šumama. Također je ovim Zakonom propisana i obavezna naknada za općekorisne funkcije šuma koju plaćaju sva pravna lica koja su registrovana za obavljanje djelatnosti na teritoriji Tuzlanskog kantona kao i dijelovi pravnih lica čije je sjedište van Kantona, a obavljaju djelatnost na teritoriji Kantona, u visini od 0,05% od ukupno ostvarenog prihoda. Propisana je i namjena utroška ovih sredstava.

U poglavlju XV NADZOR NAD PROVOĐENJEM ZAKONA (član 52.-55.) propisano je da Ministarstvo poljoprivrede, šumarstva i vodoprivrede vrši nadzor nad primjenom ovog Zakona i propisa donesenih na osnovu ovog Zakona, kao i upravni nadzor nad obavljanjem poslova određenih ovim Zakonom, koji predstavljaju vršenje javnih ovlaštenja. Ovim Zakonom je propisano i to da inspekcijski nadzor nad primjenom ovog Zakona vrši Kantonalna uprava za inspekcijske poslove-šumarska inspekcija.

U poglavlju XVI KAZNE NE ODREDBE (član 56.-59.) propisane su kazne, sankcije i zaštitne mjere.

U poglavlju XVII PRIJELAZNE I ZAVRŠNE ODREDBE (član 60.-66.) propisani su rokovi za preuzimanje određenih poslova kao i postupanje u prelaznom periodu, datum primjene i stupanje na snagu Zakona.

IV -- DODATNA FINANSIJSKA SREDSTVA ZA PROVOĐENJE ZAKONA

Za primjenu - provođenje ovog Zakona nije potrebno angažiranje dodatnih finansijskih sredstava iz Budžeta Tuzlanskog kantona.

Obrađivač

**Ministarstvo poljoprivrede,
šumarstva i vodoprivrede**